



Ji olên Mirovatiyê Ola Bûda

Cankurd
06.05.2006

Ola Bûdî pir fireh û pane, lew re di gotarekê de tev naye şirovekirin. Lê ezê bizava xwe bikim, ku divê gotarê bi kurtî hinek stûnên wê yê serekîn bidim nasdanê.

Ola bûda olek wehaye, ku Xwedê nanase û lew re em nikanin li ser evdalên vê olê nave "**Keşe**" bidinê, ku ewan jî di navbera Xwedê û mirov de ji xwe re pilyek pêda kirine. Na ne wilo ye, ji ber ku Xwedê di nav ramanên vê olê de nine. Ewan ne wek evdalên dêrê ne. Lê belê avahiyek wan a di ser hev re wek ya dêrê filehan û îmamtiya Şîîyan heye. Di nav wan de 3 pile hene:

- **Upî înzîn**
- **Maung Cîn**
- **Kiyang tha**

Di pileya pêşîn de "**Upî înzîn**", her mirovek dikare bibe evdal, gava xwe ji jîna giştîyane bidûrxîne, zagonên perestgehê li ser xwe bi cih bîne, û jînek evdaliyê bijî. Cilêd wan sipî ne, ji yê evdalên dî cihê ne, hema ne giring e, ku ewan di perestgehê de bijîn.

Gelek kesên, ku wek "**Kolî**" tên bi navkirin û demek dirêj bêkar dimînin, an jî dikevin destengiyê, cilêd sipî li xwe dikin, pore xwe "**pirça serê xwe**" kurdikin, tûrikê parse davên mile xwe û di kolanan re digerin, xwe wek evdalên Bûdî didin xuyakirinê.

Di perestgehê de evdal baş tên xwedîkirin, ka ewan mirov in azad in an ne. Bi dilxweşiya dayik û bavê xwe hatîne an ne, dev ji jîna rastîn berdane an ne û xwe ji dil de avêtine ber zagonên perestgehê an ne?. Divê ewan her li mirinê biramin, dost û yaran, mal û malbatan û her şeweyekî xweşiya jînê ji dest bidin, tenê balatirîn rewşa navxweyî ya bi nave "**Nêrvana**" tê nasîn, ji xwe re bikin armanc. Divê ewan ji bîr nekin, ku wê jîna wan bi êş û bêxweşî û bê bidestxistina tiştan be. Cil û bergêd van evdalan wek ên evdalên hindî yê Askêt û Dandiyên in, sê parên qumaşê zer in. Diviya li gor zagona Bûdahas, cilêd wan pir asan û erzan û çirok bana, lê diyare di vê yekê de evdalên Bûdî baş li gor wê zagonê naçin. Hinek ji wan bi cilên hevrişmî di nav gel de, rojên şahiyê digerin û pir hajê dikin, ku ewana wek patronên maldar bînin. Hinek ji wan jî rojên şahiyê diçin ji xwe re li lîsk û şano û sêrkê sêrdikin.

Van evdalên ku wek pileyê duwê "**Maung cîn**" tên navkirin, di piraniyê de hîn ji deh saliyê de, ji aliyê dayik û bavê ve tînin şandin bo ku li perestgehê fêr bibin. Divê ewan nekujin, nedizin, direwan nekin, serxweş nebin, zêr û zîv hilnegirin, destêd xwe bi çek û debanan nekin, û nabe ku ewan xwe bi kulîlkan bixemilînin, an bi jinan re li gan Kevin.

Em dibînin, ku fêrkirinên Bûda jî ne dîr in ji "**Wesek**" ên Cihotiyê, Filetiyê û Musilmantiyê.

Hema "**Kiyang tha**" bê cilêd derwêş û evdalan in, di piraniyê de zarokêd sêwî ne. Ewana alîkariya evdalên perestgehê dikin, di parskirinê de, û sîwana bo paristina wan ji baran û tava royê hildigirin.

Di perestgehê de jînek bê xweşî ye, lê ji ber ku gelek kes diyariyan jib o evdalan tînin, da bereketa wan bi ser xwe ve bînin, hinde perestgeh bi diyariyan dagirtîne, ji her şeweyekî xwarinê, ji xaliyan, ji firaxêd aşxaneyê û çirax û cilan... Evdal wan diyariyan ji dest bawermendan, bê supasî û berxwedariyê dibin, lib a wan bi xwe çî giranbuhayî ji wan tiştan re tune ne. û ji ber ku kuştina jîndaran bo evdalan qedexe ye, lew re di perestgehan de, gelek mişk, pilindir, û gelek şeweyên kêzik, gêre û kurmikan pêda dibin. Ji ber pirbûna wan evdal binzor dibin, ku ji xwe re pisîkan bihewînin, da bi karê kuştina

wan bêling û carling û pirlingan rabin. Di perestgehan de gelek destnivîs hene, ku bi şêweyekî taybet hatîne çêkirin û nivîsandin, û bi wê yekê çanda Budîyan û ola wan hatiye paristin. Evdal bi lêdana darkutan re, ji berbangê ve radibin. Lêdana darkutanê ewqas bilind e, ku kesek nikare bibêje: "*Min nebihîst û lew re ez di xew de mam.*" Dest û çav û diranêd xwe dişûn û bi hev re dest bi nimêja berbangê dikin. Ew nimêj dora nîvsaetekê dirêj dike. Lê bi rastî em nikanin wa xebata berbangê bi "**Nimêjê**" navbikin, ji ber ku Budî tew bi hebûna Xwedê bawer nakin. Ewana hinde zagonên Budî, ku ezber kirine, her yek ji xwe re dixwêne û bi piranî wilo dibêjin:

"Ez dixwazim jînek hêja bijîm." An jî "Eger ez carek dî hatim jînê, ez dixwazim di pileyek balatir de bijîm."

Ev daxwaza duwê tê gotin ji ber ku Budî bawer dikin, ku mirov paş mirinê dîsa vedije û li gor karên xwe yê baş an nebaş derbas dibe pileyekê di jîna duwê de, dibe ew bibe cinewerek an sewalekî kedîkirî an jî şehzadekî hezkirî di malbata şahekî hêzdar de.

Paş wê "**nimêjê**" evdal li derveyî perestgehan belav dibin, li sancên baqirî didin, ku xelk bibihîse û bizane, ku ewan derketine parskirinê. Evdal rojê du caran xwarinê dixun, lê dive wan herdu car berî nîvro bin. Paş nîvro bo wan qedexa ye, ku bixun, û nabe zikê xwe jî pir dagirin. Divê evdal berî xwarinê, hercar bibêje, ku xwarin bi xwe ji wî re ne kêfxweşiyê, lê ji ber ku bê wê, ew nikare bijî, lew re ji bêçariyê ew wê xwarinê dixuwe. Nabe ew pençek birinc bixuwe, bê ku bibêje: "**Ez vê ji pêdiviya sirûştî dixum, ne ji ber dilxwaziya xwe.**" Nabe ewan bi xwe, hêgan "*hêkan*" bikelînin, lê jêmahîbê bihna wan û xwarinên germ û nerm dihêlin, ku evdal hinde caran zagonêd ola xwe binpê bikin.

Carina evdal li bin darekê dadinişe, gundî ji wî re xwarinê tînin, bi hîviya ku bereketê ji wê yekê bigirin. Evdal bêdeng û bê ku bi wan re têkeve çî têkilî û axiftinê, xwarina xwe bi tenê xwe dixuwe û wan gundî ji dûr ve li wî dinêrin. Nivîskarê alman ê navdar **Alexander von Gleichen-Russwurm** di pirtûka xwe de [*Cihan çandeyî ya rojhilatê dûr – cild 21, r.347*] dîmenê evdal di wê rewşê de wek yê çêlekê dibîne, ku ew jî li bin darekê wilo geyayê dixuwe.

Evdalê Budî dive herdem bîne bîra xwe û ji xelkê re diyar bike, ku her tiştêkî ser rûyê zevînê tê guhartin û jîn bi êş û keser û nalîn derbas dibe û xapînok e. Divê pênc fermanên ola Budî bo wan bibêje:

" Diziye neke, jîndarekî nekuje, zînekariyê neke, derewan neke, û xwe serxweş neke."

Em dibînin, ku van pênc ferman di olên asîmanî de jî hene, û di hinek olên dî yê berê de jî. Mirovatî di piraniya xwe de bi van fêrkirinan hatiye tîmar kirin.

Lê tevî wê yekê, Buda, ku hem wek "**hişyar**" û hem jî wek "**yê bêkêmanî**" tê nasîn, xwe wek pêxemberekî nabîne û ji xwe re kesekî wek hoste nizane. Di pirtûka Budî ya navdar "**Mahavagga**" de, li ser zimanê wî wilo hatiye:

" Min bi xwe ev nasîn pêda kiriye, ma ezê xwe bi şagirdê kê navbikim? Hostayê min nine. Ez bi xwe hostayê bê wekanî me."

Buda ne Xwedê ye, ne dîmenê wî ye li ser zevînê û ne pêxember e. Ew mirovek e wek hemîyan, ku ola xwe bi nasînen xwe yê mirovî avakiriye. Ew xwe wek her mirovekî jar dibîne, ew nexweş dibe û diweste, lê rohiya hindirî di xwe de dinase û dibîne, ku mirov nagihê mirovatiya rastîn eger ew xwe ji hemî xweşariyên zevînê azad neke. Kengê xwe ji mal û hebûn û qurretiya kesaniyê rizgar kir, hingê dikare di pileyên mirovatiyê re ta pileya paqijiyê û bêkêmasiyê hilkişe. Di vir de ew jî softiya muslimanan ve, ji evdaltiya filehan ve û ji pîriya zerdeştîyan ve nêzîk dibe. Buda kurê şahekî bû, li herêma Hîmelaya û di navbera 560 û 480 berî zayînê de jiyaye. Wek kurê şahekî, ku gelek qesrên wî hebûn û jînek wek xewn û xeyalan derbas kiriye. Lê belê dev ji wa jînê berda û bi çolê ket, da xwe "**azad**" bike. Ew heft rojan û heft şevan di koka darekê de li nav daristanekê rûnişt û hizrên xwe li ser jîn û mirinê û li ser mirov û azadbûna kesaniyê kirin. Şeytan ê ku bi nave "**Mara**" [*Di ola Cihowan û Filehan de jî Şeytan xwe wek marekî dike û Adem û Hewa dixapîne*] bi hemî kanînan û xapan û fêlbaziyên xwe û bi teviya leşkerên tariyê hêriş ser wî dikir.